

---

**BAB 7 PERLEMBAGAAN****BAHAGIAN A – AM****7.01 Pengenalan**

- (1) Bahagian B hingga N Bab ini menggariskan mengenai peruntukan yang pemohon atau perbadanan tersenarai mesti pastikan terkandung dalam perlembagaannya.
- (2) Bahagian O Bab ini menggariskan mengenai peruntukan tambahan yang suatu dana tertutup mesti pastikan terkandung dalam perlembagaannya.
- (3) Bahagian P Bab ini menggariskan mengenai peruntukan tambahan yang suatu syarikat pemerolehan kegunaan khas mesti pastikan terkandung dalam perlembagaannya.

**BAHAGIAN B – TAKRIF****7.02 Takrif**

Bagi maksud Bab ini, melainkan jika konteksnya menghendaki makna yang lain, “**syarikat**” bererti suatu syarikat yang memohon penyenaraian dalam Senarai Rasmi atau perbadanan tersenarai.

**BAHAGIAN C – MODAL****7.03 [Dipotong]****7.04 [Dipotong]****7.05 [Dipotong]****7.06 [Dipotong]****7.07 Modal yang dibayar mendahului panggilan ke atas syer**

Modal yang dibayar mendahului panggilan ke atas syer, walaupun dikenakan bayaran faedah, tidak boleh memberikan hak untuk mengambil bahagian dalam keuntungan.

**7.08 Penerbitan syer baharu kepada anggota**

Tertakluk kepada apa-apa arahan sebaliknya yang diberikan oleh syarikat dalam mesyuarat agung, semua syer baharu atau sekuriti boleh ubah lain hendaklah, sebelum diterbitkan, ditawarkan kepada orang yang pada tarikh tawaran itu berhak untuk menerima notis daripada syarikat mengenai mesyuarat agung mengikut perkadarannya yang paling hampir yang dibenarkan mengikut hal keadaan, dengan amaun syer atau sekuriti sedia ada yang mereka berhak. Tawaran itu hendaklah dibuat melalui notis dengan menyatakan bilangan syer atau sekuriti yang ditawarkan, dan mengehadkan tempoh yang tawaran itu, jika tidak diterima, akan disifatkan sebagai ditolak, dan, selepas tamat tempoh itu, atau apabila menerima tanda-tanda daripada orang yang kepadanya tawaran itu dibuat bahawa dia menolak untuk menerima syer atau sekuriti yang ditawarkan, pengarah boleh melupuskan syer atau sekuriti itu mengikut cara yang pada pendapat mereka paling berfaedah kepada syarikat. Pengarah boleh dengan cara yang sama juga melupuskan mana-mana syer atau sekuriti baharu yang (disebabkan nisbah syer atau sekuriti baharu itu dengan syer atau sekuriti yang dipegang oleh orang yang berhak kepada suatu tawaran syer atau sekuriti baharu itu) tidak boleh, pada pendapat pengarah itu, ditawarkan dengan mudah di bawah perlembagaan ini.

**BAHAGIAN D – PELUCUTHAKKAN DAN LIEN****7.09 Lien syarikat ke atas syer dan dividen**

Lien syarikat ke atas syer dan dividen yang diisyiharkan dari semasa ke semasa berkenaan dengan syer itu, hendaklah dihadkan kepada panggilan tidak berbayar dan ansuran bagi syer tertentu yang berkenaan dengannya wang kena dibayar dan tidak dibayar, dan kepada apa-apa amaun yang mengikut undang-undang syarikat dikehendaki membayar dan telah membayar berkenaan dengan syer anggota atau anggota yang meninggal dunia.

**7.10 Penjualan syer yang dilucut hak**

Sekiranya mana-mana syer dilucut hak dan dijual, apa-apa baki selepas penyelesaian panggilan tidak berbayar serta faedah dan perbelanjaan yang terakru, hendaklah dibayar kepada orang yang syernya telah dilucut hak, atau wasi, pentadbir atau penerima serah haknya atau sebagaimana yang diarahkan olehnya.

**BAHAGIAN E – PEMINDAHMILIKAN DAN PEMINDAHAN****7.11 Pemindah milikan sekuriti**

Pemindahmilikan mana-mana sekuriti tersenarai atau kelas sekuriti tersenarai syarikat, hendaklah melalui kemasukan buku oleh Depositori mengikut Kaedah-Kaedah Depositori dan, walau apa pun seksyen 105, 106 atau 110 Akta Syarikat, tetapi tertakluk kepada seksyen 148(2) Akta Syarikat dan apa-apa pengecualian yang dibuat daripada pematuhan seksyen 148(1) Akta Syarikat, syarikat itu hendaklah terhalang daripada mendaftar atau menguatkuasakan apa-apa pemindahmilikan sekuriti tersenarai itu.

**7.12 Pemindahan sekuriti**

Jika -

- (a) sekuriti sesuatu syarikat disenaraikan di bursa saham lain; dan
- (b) syarikat itu dikecualikan daripada pematuhan seksyen 14 Akta Perindustrian Sekuriti (Depositori Pusat) 1991 atau seksyen 29 Akta Perindustrian Sekuriti (Depositori Pusat) (Pindaan) 1998, mengikut mana-mana yang berkenaan, di bawah Kaedah-Kaedah Depositori berkenaan dengan sekuriti itu,

syarikat itu hendaklah, atas permintaan seseorang pemegang sekuriti, membenarkan pemindahan sekuriti yang dipegang oleh pemegang sekuriti itu daripada daftar pemegang yang disenggara oleh pendaftar syarikat di bawah bidang kuasa bursa saham lain itu, kepada daftar pemegang yang disenggara oleh pendaftar syarikat di Malaysia dan sebaliknya dengan syarat tiada perubahan pemilikan sekuriti itu.

**BAHAGIAN F – UBAH SUAIAN HAK****7.13 [Dipotong]**

**BAHAGIAN G – PEMINJAMAN****7.14 Skop kuasa peminjaman pengarah**

Skop kuasa peminjaman lembaga pengarah hendaklah dinyatakan.

**BAHAGIAN H – MESYUARAT****7.15 Notis mesyuarat**

Notis untuk mengadakan mesyuarat hendaklah menyatakan tempat, hari dan masa mesyuarat, dan hendaklah diberikan kepada semua pemegang syer sekurang-kurangnya 14 hari sebelum mesyuarat atau sekurang-kurangnya 21 hari sebelum mesyuarat jika apa-apa ketetapan khas hendak dicadangkan atau jika ia merupakan mesyuarat agung tahunan. Apa-apa notis mesyuarat yang dipanggil untuk mempertimbangkan urusan khas hendaklah disertakan dengan suatu kenyataan mengenai kesan apa-apa ketetapan yang dicadangkan berkenaan dengan urusan khas itu. Sekurang-kurangnya 14 hari notis, atau 21 hari notis dalam hal jika apa-apa ketetapan khas dicadangkan atau jika ia mesyuarat agung tahunan, bagi tiap-tiap mesyuarat itu mesti diberikan melalui iklan dalam sekurang-kurangnya 1 akhbar harian edaran dalam negara dalam Bahasa Malaysia atau Bahasa Inggeris dan secara bertulis kepada setiap bursa saham yang syarikat itu disenaraikan.

**7.16 Rekod Pendeposit-Pendeposit**

- (1) Syarikat hendaklah meminta Depositori mengikut Kaedah-Kaedah Depositori, untuk mengeluarkan Rekod Pendeposit-Pendeposit yang kepada mereka notis mesyuarat agung kena diberikan oleh syarikat.
- (2) Syarikat juga hendaklah meminta Depositori mengikut Kaedah-Kaedah Depositori, untuk mengeluarkan Rekod Pendeposit-Pendeposit setakat tarikh terkini yang semunasabahnya boleh dikeluarkan yang hendaklah dalam apa-apa hal tidak kurang daripada 3 hari pasaran sebelum mesyuarat agung (“**Rekod Pendeposit-Pendeposit Mesyuarat Agung**”).
- (3) Tertakluk kepada Peraturan-Peraturan Perindustrian Sekuriti (Depositori Pusat) (Pemilikan Asing) 1996 (jika berkenaan), pendeposit tidak boleh dianggap sebagai anggota yang berhak untuk menghadiri mana-mana mesyuarat agung dan untuk bercakap dan mengundi dalam mesyuarat itu melainkan jika namanya terdapat dalam Rekod Pendeposit-Pendeposit Mesyuarat Agung.

**BAHAGIAN I – PENGUNDIAN DAN PROKSI****7.17 Hak mengundi anggota**

Tertakluk kepada perenggan 7.16 di atas, anggota syarikat berhak untuk hadir dan mengundi di mana-mana mesyuarat agung berkenaan dengan apa-apa syer atau syer-syer yang semua panggilan ke atas syer-syer tersebut telah dibayar kepada syarikat.

**7.18 Hak mengundi dengan cara mengangkat tangan**

Bagi ketetapan yang perlu diputuskan dengan cara mengangkat tangan, pemegang syer biasa atau syer keutamaan yang hadir sendiri dan berhak mengundi, berhak kepada 1 undi.

**7.19 Hak mengundi proksi**

Seseorang proksi berhak untuk mengundi dengan cara mengangkat tangan bagi apa-apa persoalan dalam mana-mana mesyuarat agung.

**7.20 [Dipotong]****7.21 Pelantikan berbilang proksi**

- (1) Jika seseorang anggota syarikat ialah penama diberi kuasa terkecuali yang memegang syer biasa dalam syarikat bagi berbilang pemilik benefisial dalam satu akaun sekuriti ("**akaun omnibus**"), tiada had bilangan proksi yang penama diberi kuasa terkecuali boleh melantik berkenaan dengan setiap akaun omnibus yang dipegang olehnya.
- (2) Penama diberi kuasa yang dikecualikan merujuk kepada penama diberi kuasa yang ditakrifkan di bawah Akta Perindustrian Sekuriti (Depositori Pusat) 1991 ("**SICDA**") yang dikecualikan daripada mematuhi peruntukan subseksyen 25A SICDA.

**7.21A [Dipotong]****BAHAGIAN J – PENGARAH****7.22 Kuasa pengarah untuk mengisi kekosongan biasa dan untuk melantik pengarah tambahan**

Jika pengarah diberi kuasa untuk melantik seseorang sebagai pengarah sama ada untuk mengisi kekosongan biasa, atau sebagai tambahan kepada lembaga pengarah, mana-mana pengarah yang dilantik hendaklah memegang jawatan sehingga mesyuarat agung tahunan syarikat yang berikutnya sahaja, dan selepas itu layak untuk dipilih semula.

**7.23 Saraan pengarah**

Fi yang kena dibayar kepada pengarah bukan eksekutif hendaklah suatu amaun tetap, dan bukan secara komisen atau peratusan atas keuntungan atau perolehan. Gaji yang kena dibayar kepada pengarah eksekutif tidak boleh termasuk komisen atau peratusan atas perolehan.

**7.24 Kelulusan pemegang syer tahunan bagi fi dan manfaat pengarah**

Fi pengarah, dan apa-apa manfaat yang kena dibayar kepada pengarah hendaklah tertakluk kepada kelulusan tahunan pemegang syer dalam mesyuarat agung.

**7.25 Kepentingan pengarah dalam kontrak**

Seseorang pengarah tidak boleh mengundi berkenaan dengan apa-apa kontrak atau kontrak yang dicadangkan atau perkiraan yang dia mempunyai, secara langsung atau tidak langsung, suatu kepentingan.

**7.26 Pemilihan pengarah**

- (1) Pemilihan pengarah hendaklah dibuat setiap tahun.
- (2) Semua pengarah hendaklah bersara daripada jawatan sekali sekurang-kurangnya dalam setiap 3 tahun, tetapi layak untuk dilantik semula.

**7.27 [Dipotong]**

**7.28 Notis mengenai niat untuk melantik pengarah**

Tiada mana-mana orang, yang bukan seorang pengarah yang akan bersara, layak untuk dilantik ke jawatan pengarah dalam mana-mana mesyuarat agung melainkan jika seseorang anggota yang berhasrat untuk mencadangkan pemilihannya telah, sekurang-kurangnya 11 hari cerah sebelum mesyuarat itu, meninggalkan di pejabat berdaftar syarikat suatu notis secara bertulis yang ditandatangani dengan sewajarnya oleh calon, yang memberi keizinan ke atas pencalonan itu dan menandakan pencalonannya bagi jawatan itu, atau niat anggota itu untuk mencadangkannya untuk dipilih, dengan syarat dalam hal seseorang yang disyorkan oleh pengarah untuk dipilih, notis 9 hari genap sahaja perlu diberikan, dan notis setiap dan tiap-tiap pencalonan bagi pemilihan untuk jawatan lembaga pengarah hendaklah disampaikan kepada pemegang syer berdaftar sekurang-kurangnya 7 hari sebelum mesyuarat yang pemilihan itu hendak dibuat.

**7.29 Kuasa pengarah pengurusan**

Seseorang pengarah urusan, atau seseorang yang melaksanakan fungsi seseorang pengarah urusan, walaupun dengan apa jua nama dipanggil, hendaklah tertakluk kepada kawalan lembaga pengarah.

**7.30 Prosiding dalam hal kekosongan**

Pengarah sedia ada boleh terus bertindak walaupun terdapat apa-apa kekosongan di dalam pertubuhan mereka, tetapi jika dan selagi bilangan mereka dikurangkan di bawah bilangan minimum yang ditetapkan oleh atau menurut perlembagaan syarikat, pengarah sedia ada itu boleh, kecuali dalam kecemasan, bertindak hanya bagi tujuan meningkatkan jumlah pengarah kepada bilangan minimum itu, atau memanggil mesyuarat agung syarikat.

**7.31 Pelantikan pengarah pengganti**

Seorang pengarah boleh melantik seseorang untuk bertindak sebagai pengantinya dengan syarat –

- (a) orang itu bukan pengarah syarikat;
- (b) orang itu tidak bertindak sebagai pengganti bagi lebih daripada satu pengarah syarikat;
- (c) pelantikan itu diluluskan oleh majoriti anggota Lembaga yang lain; dan
- (d) apa-apa fi yang telah dibayar oleh syarikat kepada pengganti itu hendaklah ditolak daripada saraan pengarah itu.

**7.32 Undi pemutus pengerusi**

Jika 2 orang pengarah membentuk kuorum, pengerusi bagi mesyuarat yang hanya kuorum tersebut hadir atau yang hanya 2 orang pengarah berwibawa untuk mengundi bagi permasalahan yang menjadi isu, tidak mempunyai undi pemutus.

**BAHAGIAN K – AKAUN****7.33 [Dipotong]**

**BAHAGIAN L – PENGGULUNGAN****7.34 Pembahagian aset**

Asas yang padanya para pemegang syer akan mengambil bahagian dalam pembahagian aset setelah penggulungan, hendaklah dinyatakan.

**7.35 [Dipotong]****BAHAGIAN M – KESAN KEHENDAK-KEHENDAKINI****7.36 Kesan Kehendak-Kehendak Penyenaraian**

- (1) Walau apa pun yang terkandung dalam perlembagaan ini, sekiranya Kehendak-Kehendak Penyenaraian melarang sesuatu tindakan dilakukan, tindakan itu tidak boleh dilakukan.
- (2) Tiada apa-apa yang terkandung dalam perlembagaan ini menghalang suatu tindakan dari dilakukan yang Kehendak-Kehendak Penyenaraian menghendaki supaya ia dilakukan.
- (3) Sekiranya Kehendak-Kehendak Penyenaraian menghendaki suatu tindakan dilakukan atau tidak dilakukan, kuasa diberikan bagi tindakan itu dilakukan atau tidak dilakukan (mengikut mana-mana yang berkenaan).
- (4) Sekiranya Kehendak-Kehendak Penyenaraian menghendaki perlembagaan ini mengandungi sesuatu peruntukan dan ia tidak mengandungi peruntukan sedemikian itu, perlembagaan ini dianggap mengandungi peruntukan itu.
- (5) Sekiranya Kehendak-Kehendak Penyenaraian menghendaki perlembagaan ini untuk tidak mengandungi sesuatu peruntukan dan ia mengandungi peruntukan sedemikian itu, perlembagaan ini disifatkan tidak mengandungi peruntukan itu.
- (6) Sekiranya mana-mana peruntukan perlembagaan ini adalah atau menjadi tidak selaras dengan Kehendak-Kehendak Penyenaraian, perlembagaan ini disifatkan tidak mengandungi peruntukan itu setakat ketidakselarasan itu.
- (7) Bagi maksud perlembagaan ini, melainkan jika konteksnya menghendaki makna yang lain, "**Kehendak-Kehendak Penyenaraian**" bererti Kehendak-Kehendak Penyenaraian Pasaran Utama Bursa Malaysia Securities Berhad termasuk apa-apa pindaan kepada Kehendak-Kehendak Penyenaraian yang dibuat dari semasa ke semasa.

**BAHAGIAN N – PINDAAN BABINI****7.37 Pindaan Bab ini**

Jika apa-apa pindaan dibuat oleh Bursa kepada peruntukan Bab ini, syarikat mesti membuat pindaan yang berpadanan dengan perlembagaannya untuk mencerminkan pindaan tersebut melainkan jika perlembagaannya termasuk peruntukan dalam perenggan 7.36 atau yang setara dengannya.

**BAHAGIAN O – DANA TERTUTUP****7.38 Pindaan dasar dan objektif pelaburan**

Apa-apa pindaan kepada dasar dan objektif pelaburan dana tertutup hendaklah diluluskan oleh pemegang syer dana tertutup melalui ketetapan khas.

**7.39 Kawalan pengurusan**

Dana tertutup tidak boleh, sama ada dengan sendiri atau bersama dengan mana-mana orang, mengambil kawalan pengurusan yang sah atau berkesan terhadap pelaburan sandarannya.

**7.40 Pemegangan maksimum**

Tiada pemegang syer suatu dana tertutup boleh memegang lebih daripada 20% daripada jumlah syer yang diterbitkan daripada dana tertutup.

**7.41 Larangan terhadap pengendalian perniagaan lain**

Dana tertutup tidak boleh mengendalikan perniagaan lain selain daripada dana tertutup.

**BAHAGIAN P – SYARIKAT PEMEROLEHAN KEGUNAAN KHAS****7.42 Penyempurnaan pengambilalihan yang layak**

- (1) SPAC tidak boleh meneruskan untuk menyempurnakan pengambilalihan yang layak melainkan jika -
  - (a) dalam hal pengambilalihan yang layak terdiri daripada lebih daripada satu pengambilalihan, perjanjian jual beli yang berhubungan dengan setiap satu daripada pengambilalihan itu adalah saling bersyarat dan hendaklah disempurnakan secara serentak dalam tempoh 36 bulan dari tarikh penyenaraian SPAC di Bursa; dan
  - (b) ketetapan masing-masing pada setiap pengambilalihan yang layak telah diluluskan oleh majoriti bilangan pemegang sekuriti mengundi yang mewakili sekurang-kurangnya 75% daripada jumlah bilangan sekuriti yang dipegang oleh semua pemegang sekuriti mengundi yang hadir dan mengundi sama ada dengan sendiri atau melalui proksi dalam mesyuarat agung yang dipanggil dengan sewajarnya bagi maksud itu.
- (2) Seseorang anggota pasukan pengurusan dan orang yang berhubungan dengannya tidak boleh mengundi bagi suatu ketetapan yang meluluskan pengambilalihan yang layak.

**7.43 Hak pemegang sekuriti mengundi yang mengundi menentang pengambilalihan yang layak**

- (1) Pemegang sekuriti mengundi, selain anggota pasukan pengurusan dan orang yang berhubungan dengannya, yang mengundi menentang pengambilalihan yang layak dalam mesyuarat yang diadakan untuk mempertimbangkan pengambilalihan yang layak itu berhak untuk menerima, sebagai pertukaran untuk sekuriti mereka, suatu jumlah yang bersamaan dengan bahagian pro rata daripada jumlah yang dipegang pada masa itu dalam Akaun Amanah, setelah ditolak apa-apa cukai yang kena dibayar dan perbelanjaan yang berkaitan dengan kemudahan pertukaran itu, dengan syarat pemerolehan yang layak itu diluluskan dan diselesaikan tidak lewat daripada 36 bulan dari tarikh penyenaraian di Bursa.

- 
- (2) Pemegang sekuriti mengundi yang memilih untuk menukar sekuriti mereka menurut subperenggan (1) di atas hendaklah dibayar secepat yang dapat dilaksanakan setelah selesai pengambilalihan yang layak. Sekuriti yang dikemukakan oleh pemegang ini sebagai pertukaran wang tunai hendaklah dibatalkan.
- (3) [Dipotong]

**7.44 Penggulungan syarikat pemerolehan kegunaan khas**

- (1) SPAC hendaklah digulungkan mengikut undang-undang dan peraturan yang terpakai dalam keadaan yang berikut:
- (a) jika SPAC gagal menyempurnakan pengambilalihan yang layak dalam tempoh 36 bulan dari tarikh penyenaraianya di Bursa; atau
  - (b) jika sebelum SPAC menyempurnakan pengambilalihan yang layak, penyenaraian SPAC dibatalkan oleh Bursa.
- (2) Setelah penggulungan, jumlah yang dipegang pada masa itu dalam Akaun Amanah, setelah ditolak apa-apa cukai yang kena dibayar dan perbelanjaan langsung yang berkaitan dengan pengagihan penggulungan, hendaklah diagihkan kepada pemegang sekuriti mengundi masing-masing atas dasar pro rata secepat yang dapat dilaksanakan, sebagaimana yang dibenarkan mengikut undang-undang dan peraturan-peraturan yang berkenaan. Apa-apa pendapatan yang diperoleh daripada Pelaburan Yang Dibenarkan yang terakru dalam Akaun Amanah hendaklah menjadi sebahagian daripada pengagihan penggulungan.
- (3) Anggota pasukan pengurusan dan orang yang berhubungan dengannya tidak boleh mengambil bahagian dalam pengagihan penggulungan, selain berhubung dengan sekuriti yang dibeli oleh mereka selepas tarikh penyenaraian SPAC di Bursa.
- (4) Pemegang sekuriti yang bukan anggota pasukan pengurusan dan yang melabur dalam sekuriti SPAC sebelum tawaran awam awal, tidak boleh mengambil bahagian dalam pengagihan penggulungan, selain yang berhubung dengan mana-mana sekuriti yang dilanggan oleh mereka sebagai sebahagian daripada tawaran awam awal dan sekuriti yang dibeli oleh mereka selepas tarikh penyenaraian SPAC di Bursa.

[ Bab Tamat ]